

Sing vooraf staande: Skrifberyming 2-7:1 (37:1)

- 1 Toe sien ek soos 'n see van glas, / deurstraal met geel-rooi vlammelig.
En die oorwinnaars van die dier – / hul wat nie voor sy mag wou swig –
het langs die see van glas gestaan, / en daar was sitters in hul hand.
Hul het gesing soos Israel / gesing het aan die Skelfseestrand.

Ons hulp is in die Naam van die Here wat die hemel en die aarde geskape het.
Geliefdes, genade en vrede vir u van God ons Vader en die Here Jesus Christus deur die kragtige
werking van God die Heilige Gees.

Amen.

Lofpsalm 47:4 (p. 241)

- 4 Psalmsing tot Gods eer! Weet dat Hy regeer. / Hy het opgevaar, Koning is Hy daar
van die heidendom. Vorste en volke kom / om sy volk te wees, Abrams God te vrees.
Skild en teëweer is van U, o HEER! / Sing dan juublend bly! Hoog verhewe is Hy!

Geloofsbelydenis: Nicea

Na die wet sing ons van ons volharding in gehoorsaamheid met Skrifberyming 15-7:5 (43:5)

Wet

Skrifberyming 15-7:5 (43:5)

- 5 Ek kom gou! Hou dan bestendig / wat my mond aan jou beloof.
Wees net waaksaam, en laat niemand / jou die eerkroon ooit ontroof.
Wie oorwin, hom sal 'k bevestig: / as 'n suil sal hy verrys,
om daar nooit weer uit te gaan nie, / in my God se pragpaleis.

Gebed

Psalm 49:6 (p. 249)

- 6 Maar ná die dood, dan rys die dag vir my. / God sal my red, Hy koop my siel dan vry.
Hy, die oorwinnaar in die laaste stryd, / neem my dan op in ewige heerlikheid.
Vrees nie, wanneer 'n man se skatte groei, / wanneer sy huis in waarde en weelde bloei;
want by die grens daar staan die dood, die wagter; / dié wys 'n graf, en – hy laat alles agter!

Skriflesing: Openbaring 11

Teks: Openbaring 11:6-8

Hulle het mag om die hemel te sluit, sodat daar in die dae van hulle profesie geen reën val nie; en hulle het mag oor die waters, om dit in bloed te verander en om die aarde te tref met allerhande plaes so dikwels as hulle wil. En wanneer hulle hul getuienis voleindig het, sal die dier wat uit die afgrond opkom, teen hulle oorlog voer en hulle oorwin en hulle doodmaak; en hulle lyke sal lê op die straat van die groot stad wat geestelik genoem word Sodom en Egipte, waar ook onse Here gekruisig is. (Openbaring 11:6-8 AFR1953)

En 'n riet soos 'n stok is aan my gegee, en die engel het gestaan en gesê:

(Openbaring 11:1 AFR1953)

Hierdie is die enigste keer in die openbaring wat Johannes 'n opdrag kry om self iets te moet doen – toe die engel vir hom gesê het: **Staan op en meet die tempel van God en die altaar en die wat daarin aanbid.**

- Die beginsel is dat 'n eerlike en opregte ampsdraer van die Here in sy dienswerk in God se koninkryk 'n onderskeid maak tussen dinge wat heilig is en dinge wat onheilig is.

- Met dinge wat sinneloos en onrein en nutteloos vir die koninkryk van die Here is, hou hy hom nie besig nie.

Die betekenis van hierdie openbaring dat die Here sy tempel laat afmeet, is om aan te toon dat die Here sy kerk *bewaar*.

- Hy het sy uitverkorenes afgeperk/begrens.
- Hy bewaar hulle binne hierdie grense dat niks daar hulle ewige saligheid kan aantast nie.

Die mense na wie die Here hier verwys, is diegene wat die Here met hulle hele hart liefhet – die wat met lewensgevaar in die allerheilige gaan aanbid terwyl die heidene die hele stad en die res van die tempel vol is!

- Die afmeetproses openbaar dat die Here weet wie hulle is.
- Hy beveilig hulle.
- Hy bewaar hulle.

Hierdie mense word juis in God se beskerming ingesluit in 'n plek waar die ander nie kan waag om hulle voete te sit nie!

Die res van Johannes se opdrag is dat hy sekere plekke nie mag meet nie!

Maar die voorhof buitekant die tempel moet jy uitlaat en dit nie meet nie, want dit is aan die heidene gegee; en hulle sal die heilige stad twee en veertig maande lank vertrap.
(Openbaring 11:2 AFR1953)

Kom ons kry die beeld reg:

- Van watter plek word hier gepraat? Van die tempel van God.
- Wie gaan tempel toe? Mense wat die Here aanbid (of voorgee dat hulle die Here aanbid).

Met dit in gedagte luister ons na die opdrag wat die Here vir Johannes gee en dan tref die skok ons:

- Hierdie tempelbesoekers is heidene! Modern gestel: sogenaamde kerkmense.
- Maar God sien hulle nie as kerkmense nie! Hy sê hulle is heidene!
- Hy sien ook nie dat hulle die tempel besoek om Hom te aanbid nie! Hy sê hulle kom vertrap die plek!

Baie duidelik openbaar die Here dat hy daardie deel van die tempel se besoekers verwerp. Hulle is nie deel van sy verlossingsvoorsiening in die Here Jesus (die Lam) nie.

- Die feit dat die Here daardie deel van die tempel nie meet nie, beteken dat die Here daardie deel van die tempelgangers nie as sy eiendom aanneem/aanvaar nie.
- Die Here gee dus daardie deel van die tempel oor aan die wêreld en aan verderf.

Dit was in beginsel al so toe Johannes as 'n jong man saam met die Here Jesus deur die tempel geloop het! Hierdie selfde Johannes het dit met sy eie oë gesien en dit twee keer meegemaak dat die Here die tempel met 'n sweep skoongemaak het – een keer aan die begin van sy bediening en een keer aan die einde van sy bediening.

Die beginsel wat agter hierdie losbandige mense lê, is dat dit die vervolgers se hoofdoel is om die hele kerk van die Here van die aarde af uit te roei.

- Hulle mikpunt is om alle spore van die evangelie van verlossing weg te vee asof die Here Jesus nooit daar was nie, en asof Hy geen versoening en verlossing bewerk het nie.

En wanneer hulle hul getuienis voleindig het, sal die dier wat uit die afgrond opkom, teen hulle oorlog voer en hulle oorwin en hulle doodmaak; (Openbaring 11:7 AFR1953)

Die Here het grense vir alle dinge.

- Sodra 'n saak sy doel gedien het, beëindig die Here dit.
- Dieselfde geld die verkondiging van die evangelie. Daar kom 'n dag wanneer die Here 'n streep trek en aankondig dat dit nou genoeg was!
- So kondig die teks aan dat daar 'n dag aanbreek wanneer die getuies van die Here hulle werk klaar gedoen het! Hulle werk is voleindig.

Ons eerste verwagting sou wees dat almal dan die evangelie gehoor het en tot bekering gekom het.

- Maar dit is alles behalwe die geval.
- Dan laat die Here die antichris oorneem – terwyl groot getalle mense uit die kerk hom navolg.

Wat is die ding wat die moeilikheid veroorsaak? Die antwoord is: Die onbekeerlikheid van die mense.

Op daardie tydstip kom die dier uit die afgrond op en hy maak die gelowiges dood. Die Here laat dit toe.

- Dan breek daar 'n tyd van grenslose haat teen die kerk van die Here aan.
- Die antichristelike mag oorheers dan die hele wêreldgeskiedenis.

Hoe kry die dier dit reg om die mensdom so maklik oor te neem? Die antwoord is eenvoudig: Die mense is aan sy kant!

- Omdat die Here dan sy genade terugtrek, kry hierdie dier met gemak die afvallige gelowiges en die heidene onder sy bevel.

Hierdie dier het geweldige magte. Die Here gee in die openbaringe wat volg baie aandag aan die bekendstelling van wie die dier is en hoe hy is sodat ons hom kan herken en onderskei.

Die dier is die volle werking van die satan self!

- Hy stel homself teenoor die ware diens aan die Here.
- Daarom is dit vanselfsprekend dat alle half-gelowiges en valse Christene en ook die Christene wat hulle eie reëls maak en hulle teen God opstel, onmiddellik agter die Satan gaan inval.
- Omdat hulle die grootste in getal gaan wees, het die duiwel dadelik beheer oorgeneem.

Iets moet vir ons begin vertel dat daar in die voorhof van die heidene (= "gelowiges" of: sogenaamde gelowiges?) is wat nie meer in die kerk van die Here inkom nie omdat hulle die klem verskuif het van die altaar van die Here af na die eiewilligheid van die voorhof vir die heidene toe.

- Met al die aardse magte aan sy kant maak die dier dan al die getuies van die Here dood.
- Dan is dit met die ware kerk op die aarde verby.
- Waarom laat die Here dit toe? Omdat die getuies se werk dan al afgehandel is. Die Bybel leer ons hier dat daar dan so min gelowiges is wat nog op die regte spoor sal wees dat die Here ter wille van hulle die dae verkort.

Die hele wêreld gaan bly wees omdat die kerk en sy getuies uiteindelik uit die pad gaan wees. Die pyn wat die kerk veroorsaak wanneer hy mense se gewetens wakkermaak oor hulle sondes is dan uit die pad uit.

Daarom begrawe hulle nie eers die gelowiges nie:

hulle lyke sal lê op die straat van die groot stad wat geestelik genoem word Sodom en Egipte, waar ook onse Here gekruisig is. (Openbaring 11:8 AFR1953)

- Dit verwys na die leweloosheid wat agtergebly het waar daar eertyds aanbidders en aanbidding was.

Kan jy jou 'n kerk indink waar daar geen prediking meer plaasvind nie!? Want dis waarop alles afstuur. Die ope vraag is of daar nie vandag alreeds sulke kerke is nie?

Die Bybel verwys met die woorde *Sodom* en *Egipte* terug na die Ou Testament.

- Dit verwys na die tipe mense wat in daardie plekke gebly het en wat hulle gedoen het – hulle lewenstyl en hulle sondes!
- Sodom is die simbool van die homoseksuele en hulle sondes – vandaar die woord **sodomie!**
- Egipte is die simbool van die hel en verslaafdheid aan en deur die sonde.

Die mense wat uiteindelik losbreek van die kerk van die Here – en wat verantwoordelik is vir die vernietiging van die kerk van die Here, is kenbaar:

- Dis mense met vuil sedes en afskuwelike lewenswaardes (Sodom).
- Hulle is verdrukters van die ware gelowiges. Hulle maak van die ware gelowiges hulle slawe (Egipte).

Die dooies word nie begrawe nie. Die simboliek is duidelik:

- Die dier en sy aanhangers (die hele wêreld!) wys daarmee dat hulle geen eerbied of respek vir die Here het nie.
- Hulle mis ook nie die Here en sy reëls vir die lewe nie!
- Hulle vertoon skaamteloos die felheid van hulle haat teen God en elke gelowige.

NB In daardie stadium sal daar niemand wees wat huil oor al die mense wat doodgemaak is en net so gelaat is nie! Die skokkende is dat hierdie mense werklik sonder berou sal wees omdat hulle die kerkleiers uitgemoor en die Christendom uitgeroei het. Daar gaan ongekeende vreugde wees oor letterlik elke faset van die kerk van die Here wat vernietig is!

Daar is algemene en totale blydschap omdat die getuies van die Here doodgemaak (vermoor) is.

- Die mense sal so bly wees dat hulle sal feesvier en vir mekaar geskenke gee!
- Dit teken die sielsingesteldheid van daardie mense:
 - Daar is nie meer 'n geestelike (spirituele) verbintenis met die Here nie.
 - Hulle belange is ingebed in aardse plesier en sedeloosheid.
 - Daar is dus ook geen hemelse gerigtheid nie.

Dan kom die eindoordeel. God gryp self in. Die apostel Johannes sien: **'n groot vrees het geval op die wat hulle aanskou het.**

Die gelowiges word opgewek en die ander staan daar met die verskriklikste vrees. Waarom is hulle so verskriklik bang?

- Omdat hulle dink die mense wat uit die dood opgestaan het, gaan nou wraak neem!
- Hulle vrees is dat die gelowiges dieselfde wreedheid en duiwelstreke as hulle gaan uithaal!
- Hulle kan nie anders dink nie, want hulle ken God nie – daarom ook nie sy genade en liefde nie. Al wat hulle geken en gesoek het tydens hulle lewe was die werke en lewenstyl van die duiwel.

Daar gebeur presies die teenoorgestelde van wat die mense wat so angsbevange is, verwag.

En hulle het 'n groot stem uit die hemel vir hulle hoor sê: Kom op hierheen! En hulle het opgevaar na die hemel in die wolk, en hul vyande het hulle aanskou.

(Openbaring 11:12 AFR1953)

'n Groot (harde) stem uit die hemel kondig aan dat die gelowiges wat opgewek is, opgeneem word in die hemel.

Hoekom word die mense in die hemel opgeneem?

- Omdat God met sy uitverkorenes doen wat Hy met sy Seun gedoen het.
- Die Here Jesus het dan juis vir ons gesterf sodat ons Hom in sy opstanding en hemelvaart kan volg!

Ons ken die spesifieke optrede van die Here van baie vroeg in die geskiedenis af. Dink maar net aan Henog!

- God roep sy opgestane heiliges na Hom toe – maar nie die klomp ongeregtiges nie! Hulle sien die skeiding wat God tussen die mense aanbring – en hoe hulle agterbly!
- Daarom verdiep hulle vrees – hulle verstaan meteens hulle eie swakheid en nietigheid teenoor die Een wat hulle gedink het dat hulle Hom volkome verslaan en uitgeroei het.

Die wat opgewek is en die (enkele) gelowiges wat nog op die aarde lewe, word dan deur die Here in die lug opgeneem. So gaan ons die Here dan tegemoet. (1 Tessalonisense 4)

Dan kom die laaste gerig. Die verskriklikste dinge gebeur. Die hele aarde is meteens vol verwoesting en angs!

- **...het daar 'n groot aardbewing gekom...**
- **'n tiende van die stad het geval,...**

Die stad wat inmekaarstort, is die groot Babilon. Dis die stad wat in daardie stadium die middelpunt van die antichristelike wêreldmag is.

Die Here laat dus die mag van die antichris in duie sort – daarmee is dit met die antichris verby op die oomblik wanneer die Here kom.

- Massas mense sterf.
- Die orige mense word letterlik met angs oorval! Hulle bely God – maar uit vrees – nie tot hulle bekering nie!

Met die eindgerig openbaar die Here dat Hy in alle opsigte Here en God en Koning is.

En die vier en twintig ouderlinge wat voor God op hulle trone sit, het op hulle aangesig geval en God aanbid en gesê: Ons dank U, Here God, Almagtige, wat is en wat was en wat kom, dat U u groot mag aangeneem en as koning geheers het. (Openbaring 11:16, 17 AFR1953)

Die sang van die sangers word afgewissel met die aanbidding van die ouderlinge.

- Hulle is die verteenwoordigers van die Here se totale gemeente – die volle heilige algemene Christelike kerk.
- Hulle is verteenwoordigers van alle uitverkorenes (= gereddes) van skepping tot op hierdie oomblik van die eindoordeel van God.

Kyk wat doen die ouderlinge!

- Hulle klim van hulle trone af en val op hulle gesigte voor God neer!
- Hulle doen afstand van enige vorm van regering en word totale diensknegte van God.
- Met die diepste eerbetoon hef hulle 'n danklied aan tot eer van God.

Let op die opeenstapeling van die Here se grootheid:

- **Here**

- **God,**
- **Almagtige,**
- **wat is en wat was**
- **en wat kom,**
- **dat U u groot mag aangeneem en as koning geheers het.**

Die Here het sy almagtigheid in die lig gebring deur sy Koningskap nou tot volle openbaring te bring.

- In die openbaring van sy ewige Koningskap is dit duidelik dat Hy in sy Godheid ongeskape is: Hy is en was.
- Hy het nou met sy koms al sy haters vernietig.

Voor almal se oë het Hy die mag van die dier (antichris) doodgewoon laat degenerereer en verdwyn sodat Hy openbaar dat Hy daarvoor heers – dat Hy oor letterlik alles heers.

Die nasies/heidene se woede het daarop uitgeloop dat hulle die Christene doodgemaak het en die kerk van die Here uitgeroei het (vs 7vv).

- Hulle het vas geglo dat hulle God daarmee uitgeroei gehad het!

Toe verskyn die Here in sy toorn om te oordeel oor die dode. Die ouderlinge bely dat die Here se oordeel in twee vlakke uiteenval:

- Eerste kry
 - die diensknegte – profete – en
 - al die heiliges en
 - al die wat die Naam van die Here vrees by die Here hulle loon.
- Dit beteken hulle word salig.
 - Letterlik almal – klein en groot – word salig.
 - Daarom word elke moontlike beskrywing van wie 'n gelowige is, gegee.

Daarna word daar kort en bondig bely dat die Here ook gekom het **om die verderwers van die aarde te verderf.**

- Dis 'n bondige beskrywing van die vertoornde heidene wat almal vir ewig in die hel is (verderf toe).

Al die ander dinge openbaar die volheid van aanbidding aan God.

- Die weerligte simboliseer die onsienbare heiligheid van God.
- Die stemme simboliseer die almag van God in sy spreek en bevele – maar ook van die ontelbare engele en verlore mense wat Hom loof en prys.
- Die donderslae, aardbewings en hael is die simbole van die mag waarmee God sy haters verwoes.

Met hierdie openbaring verduidelik die Here dat Hy die regering van die antichris of enige mag toelaat om tot stand te kom, maar dat Hy dit ook tot niet maak net wanneer Hy wil.

Hy beskik dus met sy onmeetbare almag dat Hy sy kerk deur die tyd versorg en daaraan die ewige saligheid toeken.

Amen.

Slotgebed

Skrifberyming 5-4:1, 2 (10:1, 2)

1 Wie kan ons voor die regter daag?
Gods uitverkore kind verklaag?
Waar is die mond wat durf verdoem
as God sy kind regverdig noem?

2 Dis Christus wat die skuld wou dra,
die dood vir ons gesterf het, ja,
wat, opgewek, in glorie sit
en altyddeur vir ons wil bid.

Die genade van die Here Jesus Christus en die liefde van God en die gemeenskap van die Heilige Gees bly by u almal.

Amen.

Dr MJ du Plessis
Gereformeerde Kerk Bellville
Datum: 19 Junie 2011